

忠孝誥總論

混沌之初未有物先有道既有道即有物道無形物有形有形之物必載無形之道何物無道何道離物因物命名因名思義因義思道名歸物物歸義義歸道無名天地之始有名萬物之母合而言之何物何名何義總括之曰道無道即無物無物即無名無名即無義道也者在天地未生之前即在天地既生之後道亦一物也天地亦一物也萬物總一物也一物分萬物也洪荒初闢天地生而萬物生萬物生而人最靈故易曰有天地然後有萬物有萬物然後有男女有男女然後有夫婦有夫婦然後有父子有父子然後有君臣有父子君臣然後有忠孝之名蓋人未生之前漠然無朕而道在於天地人既生之後秉氣成形而道即蘊於性中是天地之道俱在於人身無有參差偏漏無有阻礙間斷舉一身之心思耳目手足鼻息脉絡筋骨宰於心而發於意發於意而形於事本身一天地也天地一太極也太極一無極也於以知道中不止於忠孝而忠孝爲行道之始孝又爲忠之始忠孝之德自賦質之時蚤已具於性中宜人爲孝子爲忠臣人人爲孝子則世永無忤逆之事人人爲忠臣則世永無反亂之日乃天運不常人心多故胞胎之時忠孝之心渾然焉嬰孩之時忠孝之心油然焉及長而嗜慾惑其心妻子變其心財帛搖其心爵祿動其心得失橫其心利害間其

道藏輯要

呂帝文集

學

宰集五
X₁X₂X

心而忠孝之良能已盡矣其本來矣使予今日欲世人生而爲忠臣孝子則難勸世人學而爲忠臣孝子則易至於學之之法當讀書以明其理持敬以養其心積誠以動其意舉念以察其私獨行獨寢如君親之臨也一行一動如君親之訓也入而家庭出而朝廷竭其力而不敢自以爲孝人自稱其孝致其身而不敢自以爲忠人自稱其忠然忠孝未有不相因者古云求忠臣於孝子之門能孝卽能忠能忠必先孝雖成名各有不同或以忠顯或以孝顯要其理則一也故純忠純孝非生知聖人不能而大忠至孝智愚皆可勉至所謂純者全體大德至精至微無絲毫間議天地以道付我我卽以道全還於天地天地且賴

道藏輯要

呂帝文集

聖

室集五
八八八

其參贊化育其殆聖之神乎所謂大與至者就其大段而言忠行孝德膾炙人口天地以道付我我無愧於天地之道且有功於綱常名教其殆賢人以上者乎神聖不可妄希賢哲宜爲效法庸常之道功不求之遠而求之近事不取之難而取之易同爲天地所生之人彼則神靈千古已則湮沒無聞於此當大加猛進欣然改過每見世之人學佛學仙發心發願苦加修行一念之不忠孝仙佛卽時棄絕妄廢其功蓋古今無不忠孝之神仙無不忠孝之佛祖仙佛必自忠孝中來木有根水有源離忠離孝非佛非仙余特爲世人指出忠孝之至可以格天地可以泣鬼神可以動風雷可以致雨雪可以蹈江河可以開金石可

以化鳥獸可以感草木可以遺子孫可以爲賢聖可以成佛仙
報應無窮功德無量余因作此忠孝之誥舉此忠孝之神果有
能信心者朝夕拜誦熟之於中見之於事余必偕眾神臨壇聽
誦以佑斯人以成善果以致吉祥福神長照災禍不臨豈不善
哉豈不善哉

道藏輯要

呂帝夕集

聖

室集五